

刀筆菁華錄

三

詳註新評
現代實用

刀筆精華錄

卷五 名臣劾疏精華

我有筆如刀室主編

彈劾嚴嵩罪狀

楊繼盛

明季嚴嵩擅權播弄朝政。朝野上下敢怒而不敢言。容城楊忠愍公時爲兵部員外郎。剛毅果敢。直聲振天下。獨草嚴嵩十大罪狀。上書參劾。其所以能侃侃而談。旁若無人者。蓋由於忠勇之氣激發而然也。

臣孤直罪臣。蒙天地恩。超擢不次。夙夜祇懼。思圖報稱。蓋未有急於請誅賊臣者也。方今外賊惟俺答。內賊惟嚴嵩。未有內賊不去。而可除外賊者。去年春雷久不聲。占曰大臣專政。冬日下有赤色。占曰下有叛臣。又四方地震。日月交食。臣以爲災皆嵩致。請以嵩十大罪爲陛下陳之。高皇帝罷丞相。設立殿閣之臣。備顧問視制草而已。嵩乃儼然以丞相自居。凡府部題覆。先面白

而後草奏。百官請命奔走。直房如市。無丞相名而有丞相權。天下知有嵩。不知有陛下。是壞祖宗之成法。大罪一也。陛下用一人。嵩曰我薦也。斥一人曰。此非我所親故罷之。陛下省一人。嵩曰我救也。罪一人曰。此得罪於我故報之。伺陛下喜怒以恣威福。羣臣感嵩甚以感陛下。畏嵩甚於畏陛下。是竊君上之大權。大罪二也。陛下有善政。嵩必令世蕃告人曰。主上不及此。我議而成之。又以所進揭帖刊刻行世。名曰嘉靖帝議。欲天下以陛下之善盡歸於嵩。是掩君上之治功。大罪三也。陛下令嵩司票擬。蓋其職也。嵩何取而令子世蕃代擬。又何取而約諸義子趙文華輩羣聚而代擬。題疏方上天語已傳。如沈鍊劾嵩疏。陛下以命呂本。本卽潛送世蕃所。令其擬上。是嵩以臣而竊君之權。世蕃復以子而盜父之柄。故京師有大丞相小丞相之謠。是縱姦子之僭竊。大罪四也。嚴效忠嚴鵠乳臭子耳。未嘗一涉行伍。嵩先令效忠冒兩廣功。授錦衣所鎮撫矣。效忠以病告。鵠襲兄職。又冒瓊州功。擢千戶。以故總督歐陽必進躡掌工部總兵。陳圭洊統後府巡按。黃如桂亦驟亞太僕。既藉

私黨以官其子孫。又因子孫以拔其私黨。是冒朝廷之軍功。大罪五也。逆鸞先已下獄論罪。賄世蕃三千金。薦爲大將。鸞冒禽哈喇兒功。世蕃亦得增秩。嵩父子自誇能。薦鸞矣。及知陛下有疑鸞心。復互相排詆。以泯前迹。鸞勾賊而嵩世蕃復勾鸞。是引背逆之姦臣。大罪六也。前俺答深入。擊其惰歸。此一大機也。兵部尙書丁汝夔。問計於嵩。嵩戒無戰。及汝夔逮治。嵩復以論救給之。汝夔臨死大呼曰。嵩誤我。是誤國家之軍機。大罪七也。郎中徐學詩劾嵩革任矣。復欲斥其兄中書舍人。應豐給事。厲汝進劾嵩。謫典史矣。復以考察令吏部。削其籍。內外之臣。被中傷者。何可勝計。是專黜陟之大柄。大罪八也。凡文武遷擢。不論可否。但衡金之多寡。而畀之。將弁惟賄。嵩不得不朘削士卒。有司惟賄。嵩不得不掊剋百姓。士卒失所。百姓流離。毒徧海內。臣恐今日之患。不在境外。而在域中。是失天下之人心。大罪九也。自嵩用事。風俗大變。賄賂者薦及盜跖。疏拙者黜逮夷齊。守法度者爲迂疏。巧彌縫者爲才能。勵節介者爲矯激。善奔走者爲練事。自古風俗之壞。未有甚於今日者。蓋嵩好

利天下皆尙貪。嵩好諛。天下皆尙諂。源之弗潔。流何以澄。是敝天下之風俗。大罪十也。嵩有是十罪。而又濟之以五奸。知左右侍從之能察意志也。厚賄結納。凡陛下言舉動措。莫不報嵩。是陛下之左右皆賊嵩之間諜也。以通政司之主出納也。用趙文華爲使。凡有疏至。先送嵩閱竟。然後入御。王宗茂劾嵩之章。停五日乃上。故嵩得展轉遮飾。是陛下之喉舌。乃賊嵩之鷹犬也。畏廠衛之緝訪也。令子世蕃結爲婚姻。陛下詰嵩諸孫之婦。皆誰氏乎。是陛下之爪牙。皆賊嵩之瓜葛也。畏科道之多言也。進士非其私屬。不得預中書。行人選推官知縣。非通賄不得預給事。御史選旣選之後。入則杯酒結歡。出則餽金相屬。所有愛憎授之論刺。歷俸五六年。無非建白。卽擢京卿。諸臣忍負國家。不敢忤權臣。是陛下之耳目。皆賊嵩之奴隸也。科道雖入籠絡。而部寺中或有如徐學詩之輩。亦可懼也。令子世蕃擇其有才望者。羅置門下。凡有事欲行者。先令報嵩。預爲布置。連絡蟠結。深根固蒂。各部堂司大半皆其羽翼。是陛下之臣工。皆賊嵩之心膂也。陛下奈何愛一賊臣。而忍百萬蒼生。

陷於塗炭哉。至如大學士徐階。蒙陛下特擢。乃亦每事依違。不敢持正。不可不謂之負國也。願陛下德臣之言。察嵩之奸。或召問裕景二王。或詢諸閣臣。重則直憲。輕則勒致。內賊既去。外賊自除。雖俺答亦必畏陛下聖斷。不戰而喪膽矣。

（評）此疏精氣磅礴。寒光照人。其膽大。其心細。其口快。其筆蠱。精銳如董狐之筆。光大若文山之歌。固千古直諫之至文也。豈特爲有明一代所難得已哉。

彈劾魏忠賢罪狀

楊 漣

漣字文孺。應山人。諡忠烈公。明季魏忠賢在朝。擅權誤國。楊公時官左副都御史。首先上書參劾。驚動朝野。

臣惟太祖高皇帝。首定律令。內臣不許干預外事。其在內庭。祇供使令灑掃之役。違者法無赦。故在內官。惟以循謹奉法爲賢。聖子神孫。相守未敢有改。雖有驕橫縱恣。王振劉瑾其人。旋即誅戮。故國祚靈長。至今豈意聖明在上。

乃敢於肆無忌憚。濁亂朝常。罔上行私。傾害善類。損皇上堯舜之令名。釀宗社無窮之隱禍。如東廠太監魏忠賢其人者。舉朝盡爲威劫。無敢指名糾參。臣實痛之。臣前以兵科給事中。親承先帝之命。輔皇上爲堯舜之君。言猶在耳。今若亦畏禍不言。是臣自負忠直初心。并負風紀聯掌。負皇上起臣田間特恩。他日何面目以見先帝於在天。謹撮其大罪之著者二十四款。爲我皇上陳之。忠賢原一市井無賴人耳。中年淨身。賁入內地。非能通文理。自文書司禮起家者也。皇上念其服役微勞。拔之幽賤。任以恩禮。原名進忠。改命今名。豈非欲其顧名思義。忠不敢爲奸。賢不敢爲惡哉。乃初猶謬爲小忠小佞。以倖恩。旣乃遂爲大奸大惡。以亂政。祖宗之制。以上擬托重閣臣。非但令其靜心參酌。權無旁分。正使其一力擔承。責無他卸。自忠賢專擅。旨意多出。傳奉傳奉而眞。一字抑揚之間。判若天淵。傳奉而僞。雖爲辨之。近乃公然三五成羣。勒逼講。嚶政事之堂。幾成鬬市。甚至有徑自內批。不相照會者。假若夜半出片紙殺人。皇上不得知。閣臣不及問。害豈渺小。以致閣臣鬱鬱嘆悶。有

堅意求去者。敗祖宗二百餘年之政體。大罪一也。舊閣臣劉一璟。家臣周嘉謨。同受顧命之大臣也。一璟親捧御手。首定大計。嘉謨倡率百官。於松柵下。義斥鄭養性。立寢后封。以宮禁皇上。豈遂忘之。忠賢交通孫杰。論去急於剪己之忌。不容皇上不改父之臣。大罪二也。先帝強年登極。一月賓天。進御進藥之間。普天實有隱恨。執春秋討賊之義者。禮臣孫慎行也。明萬古綱帝之重者。憲臣鄒元標也。忠賢一則逼之告病去。一則嗾言官使劾去。至今求南部片席不可得。顧於護黨氣。歐聖母者之人。曲意綢繆。終加蟒玉。以贈其行。是何親於亂賊。何仇於忠義。偏不容先朝有痛念弓鼎之老臣。大罪三也。王紀鍾羽正。先年功在國本。及紀爲司寇。執法如山。羽正爲司空。清修如鶴。忠賢一則使人喧嚷於堂。辱而迫之去。一則與沈灌交構。陷之削籍去。至今請一復職起用。不可得。顧於柔媚善附之人。破格點用。驟加一品。以歸是真。與我善者爲善人。與我惡者爲惡人。必不容盛時有正色立朝之直臣。大罪四也。國家最重無如枚卜。忠賢一手握定。力阻首推之孫慎行。盛以私更。爲他

辭以錮其出。豈真欲門生宰相乎。妄預金甌之覆字。竊作貂座之私情。大罪五也。爵人於朝。莫重廷推。去歲南太宰北少宰。推皆點陪。一以蓋枚卜點陪之案。一以伏借用爲逐之奸。致一時名賢不安俱去。顛倒有常之銓政。掉弄不測之機權。大罪六也。聖教初新。正資忠直。乃滿朝薦文震。孟鄭鄴。熊德陽。江秉謙。徐大相。毛士龍。侯震暘。賈繼春等九人。抗論稍忤忠賢。傳奉盡令降斥。屢經恩典。竟阻賜環。長安謂皇上之怒易解。忠賢之怒難饒。大罪七也。然猶曰外廷之臣子也。上年皇上南郊之日。傳聞宮中有一貴人。以德性貞靜。荷皇上寵注。忠賢恐其露己驕橫狀。謀之私比。託言急病。立刻掩殺。是皇上且不能保其貴幸矣。大罪八也。猶曰無名封也。裕妃以有喜傳封。中外欣欣相告矣。忠賢以抗不附己。屬其私比。捏倡無喜。矯旨勒令自盡。不令一見皇上之面。昔堯以十四月而生。假令當日裕妃幸存。安知不爲堯母。是皇上又不能保其妃嬪矣。大罪九也。猶曰在妃嬪也。中宮有慶。已經成男。凡在內廷。當如何保護。乃繞殿流虹之祥。忽化爲飛星墮月之慘。傳聞忠賢與奉聖夫。

人實有謀焉。以皇上麟趾開祥。何妨斯男則百。而忠賢包藏禍心。若此是皇上亦不能自保其第一子矣。大罪十也。至於先帝之在青宮。四十年操心慮患。所與護持孤危。威劫之不動。利誘之不變者。唯王安一人耳。登極一月。皇畿安甯。不可謂無功。皇上倉卒受命。雍衛防護。安亦不可謂無微忠。即使有罪。亦當聽皇上明正其罪。與天下共見之。而忠賢以私忿矯旨。掩殺於南海。且身首異處。肉飽狗彘。是不但仇王安。而實敢於仇先帝之老奴。與皇上之老犬馬。而略無顧忌也。此後內臣。誰肯復爲忠義者。其餘大小內臣。無罪而擅殺壇逐者。又不知其數千百也。大罪十一也。因而欲廣願奢。今日討獎賞。明日討祠典。要挾無窮。王言屢褻。近又於河間府。毀人居屋。起建牌坊。鏤雕鳳龍。干雲插漢。築愁築怨。飲恨吞聲。又不止於瑩地擅用朝忠規制。僭擬寢陵而已。大罪十二也。今日蔭錦衣。明日蔭中書。金吾之堂。口皆乳臭。詰勅之館。目不識丁。如魏良弼。魏良材。魏良卿。魏希孔。及外甥野子。傅應星等。五侯七貴。何以加茲。不知忠賢有何軍功。有何德行。亦甚褻朝廷之名器矣。大罪

十三也。因而手滑胆粗。用立枷之法以示威。前歲枷死皇親家人數命矣。其枷號家人者。欲扳陷皇親也。其扳陷皇親者。欲動搖三宮也。當時若非閣臣力爲護持。言官極爲糾正。椒房之戚久興大獄矣。大罪十四也。良鄉生員章士魁。卽有他罪。自有提學。乃以爭煤窰傷其墳脈。託言開礦而死矣。假令盜長陵一坏土。何以處之。趙高鹿可爲馬。忠賢煤可爲礦。大罪十五也。王思敬。胡遵道。侵占牧地。果真小則付之有司。大則付之撫按。學院足矣。而徑擎黑獄。三次拷掠。身無完膚。以皇上右文。重道。秋爽幸學。而忠賢草菅士命。使青燐赤碧之氣。先結於璧宮泮藻之間。孔子之神將無怨恫。大罪十六也。科臣周士樸。執糾織監一事。原是在工言工。忠賢徑停其陞遷。使吏部不得守其銓除。言之不敢司。其封駁愴邪。因之以偷換手眼。那移陞敘。致士樸卒困頓以去。於以成中官之尊大得矣。而聖朝則何得有此名色。大罪十七也。北鎮撫臣劉僑。不肯殺人媚人。自是在刑慎刑。忠賢以其不甚鍛鍊。竟令削籍。明示大明之律令。可以不守。而忠賢之意旨。不可不遵。將使羅鉗吉綱。然後快

心於以彰忠賢之威焰得矣。而國脈則何得崇此蘊毒。大罪十八也。科臣魏大中。到任已奉明旨。鴻臚報單。忽傳詰責。及科臣回話。臺省交論。又再襲王言。幾成解訓。無論玩弄言官於股掌。而皇皇天語。提起放倒。信手任心。令天下後世視皇上爲如何主。大罪十九也。東廠原以察奸緝細。非常非擾平民也。自忠賢受事。鷄犬不甯。而且直以快恩仇。行傾陷。野子傳應星爲之招搖。引納陳君慕爲之鼓舌搖唇。傳繼教爲之投匭打網。片語違憚。則駕帖立下。至近日之於中書汪文言。不從閣票。不會閣知。不理閣救。而應星等造謀告密。猶日夜未已。勢不至興同文之獄。刊黨錮之碑。不已者。當年西廠汪直之橫。恐未足語此。大罪二十也。國內未靖。內外戒嚴。東廠訪緝何事。前韓宗功潛入長安打點。實往來忠賢司房之家事。露始令避去。假令天不悔禍。宗功奸細事成。一旦兵逼城下。忠賢固爲□□首功之主人矣。其發銀七萬兩。更創肅寧縣新城。誠可作鄆塢深藏。不知九門內外生靈安頓何地。大罪二十一也。王者守在四口。祖制但蓄內兵。卽四衛之設備而不操。原有深意。忠賢

謀同奸相沈滄。創立內操。不但使親戚羽黨。交互盤踞其中。且安知其無大盜刺客。東藏西匿之人。寄名內相家丁。倘或伺隙謀亂。發於肘腋。智者不及謀。勇者不及拒。識者每爲寒心。忠賢相傾財厚與之交結。昔劉判招納亡命曹吉祥弟姪。傾結達官。忠賢蓋已兼之。不知意欲何爲。大罪二十二也。且皇上亦見近日忠賢進香涿州之景象乎。鐵騎之擁簇如雲。蟒玉之追隨耀日。警蹕傳呼。清塵墊道。人人以爲駕幸涿州。及其歸也。以輿夫爲遲。改駕四馬。羽幢青蓋。夾護雙遮。已則儼然乘輿矣。其間入幕密謀。叩馬管策者。實繁有徒。忠賢此時。自視爲何如人。想只恨在一人下耳。不知更作何轉念。恐泰山之神。必陰殛之矣。大罪二十三也。皇上上不記前日忠賢走馬大內之氣象乎。寵極則驕。恩多成怨。聞今春忠賢馳馬御前。皇上曾射殺其馬。待忠賢以不死。聖恩已厚。忠賢不自伏罪請死。且聞進有傲色。退有怨言。朝夕隄防。介不釋心腹之人。時時打點。從來亂臣賊子。只爭一念放肆。遂至收拾不住。皇上果真有此事。奈何養虎兇於肘腋間乎。此又寸轡忠賢不足盡其事者。

大罪二十四也。凡此逆跡。皆得之邸報。與長安之共傳共見。非出於風影意度者。忠賢負此二十四大罪。懼內廷之發其奸。殺者殺。換者換。左右既畏而不敢言。懼外廷之發其奸。逐者逐。錮者錮。外廷又皆觀望而不敢言。更有一種無識無骨。苟圖富貴之徒。或扳附枝葉。或依託門牆。或密結居停。或投誠門客。逢其所喜。挑其所怒。無所不至。內有授而外發之外。有呼而內應之。向背忽移。禍福立見。間或內廷奸狀敗露。有奉聖容氏爲之彌縫其罪戾。而遮飾其回衷。故掖廷之內。知有忠賢。不知有皇上。都城之中。知有忠賢。不知有皇上。卽大小臣工。積重之所移。積勢之所趨。亦不覺其不知有皇上。而只知有忠賢。每見中外有緊急當做之事。當起用之人。必曰要與內邊說說。或人不得用。事不得行。亦只說內邊不肯。宮中府中。大事小事。無一不是忠賢專擅。卽奏草之上。反覺皇上爲名。忠賢爲實。且如前日忠賢已往涿州矣。一切事情。必星夜驅請。一切票擬。必忠賢既到。始敢批發。嗟嗟。天顏咫尺之間。不請聖裁。而馳驅候賢。意旨於百里之外。事勢至此。尙知有皇上耶。無皇上耶。

有天日耶。無天日耶。天祚聖明。屢行譴告。去年以熒惑守斗告。今年以長日風霾告。又以一日三地震告。而乾清之震尤甚。皆忠賢積陰蔽陽之象。聖明偶不及覺察。反加之恩。而忠賢閔不畏死。更甚之惡。羽翼已成。騎虎難下。太阿倒授。主勢孤危。及今不爲早治。臣不知皇上之宗社何所託。聖躬之安危何所託。三宮九嬪之安危何所託。而如此毒心辣手。膽橫已不能爲下。心棘必不肯容人。卽普天共戴之皇子。元良託重之貴妃。能保時得其懽心。而不犯其所忌。臣又不知貴妃皇子之安危何所託。萬一少有差池。臣卽欲以死報皇上。亦復何及。伏念皇上天縱聰明。春秋鼎盛。生死予奪。豈不可以自主。何爲受制。麼小豎。令內外大小。俱坐針氈之上。而惴惴莫必其命耶。臣在兵科時。曾參及進忠名在御前。蓋實有見於忠賢狼子野心。不可嚮邇。不意聖明斷之不蚤。養成今日。倘復優遊姑息。再念其追待舊人客氏。又從旁巧爲營解。不卽加處治。小不忍則亂大謀。臣不能爲皇上策矣。高皇帝洪武十年。有內侍以久侍內廷。從容言及政事。上卽日斥遣。隨諭羣臣曰。漢唐之禍。

雖曰宦官之罪。亦人主信愛之過使然。向使宦者不得典兵預政。雖欲爲亂。其可得乎。今此宦者。雖事朕日久。不可姑息。決然去之。所以懲將來也。洋洋聖謨。中官言及政事。且懲將來。況忠賢欺君無上。惡積罪盈。豈容當斷不斷。伏乞皇上下奮雷霆。將忠賢面縛至九廟之前。集大小文武勳戚。勅法司逐款嚴訊。考歷朝中官。交通內外。擅作威福。違祖宗法。壞朝廷事。失天下心。欺君負恩。事例正法。以快神人公憤。其奉聖夫人客氏。亦並勅令居外。以全恩寵。無復令其流毒宮中。其傅應星。陳居恭。傅繼教。並下法司責問。然後布告天下。暴其罪狀。示君側之惡。已除。交結之徑已塞。如此而天意弗悅。人心弗悅。內治外安。不新開太平氣象者。請斬臣以謝忠賢。臣知此言一出。忠賢之黨斷不能容臣。然臣弗懼也。但得去一忠賢。以不誤皇上堯舜之令名。即可以報命先帝。可以見二祖十宗之靈。一生忠義之心。事兩朝特達之恩。知於願少酬。死且不憾。惟皇上鑒臣血誠。卽賜施行。

(評)忠勇欺悃。義正詞嚴。歷落寫來。不可逼視。明代直臣之作。當以此文

與忠愍公一疏。並垂千古矣。

彈劾魏忠賢罪狀

萬 燝

燝字闇夫。諡忠賢。南昌人。官工部屯田郎中。當時楊忠愍公首先上書彈魏。繼起者實多。萬公此文亦其一也。

人主有政權有利權。不可委臣下。況刑餘寺人哉。忠賢性狡而貪。膽蠱而大口。銜天憲。手握王爵。所好生羽毛。所惡成瘡痍。蔭子弟則一世再世。賚廩養則千金萬金。毒痛士庶。斃百餘人。威如縉紳。空十數署。一切生殺予奪之權。盡爲忠賢所竊。陛下猶不覺悟乎。且忠賢固供事先帝者也。陛下之寵忠賢。亦以忠賢供事曾先帝也。乃於先帝恩義。略不厝念。臣嘗屢請銅勒。不肯予。間過香山碧六寺。見忠賢自營坟墓。其規制宏敞。擬於陵寢。前列生祠。又前建佛宇。璇題耀日。珠網懸星。費金錢幾百萬。爲己墳墓則如此。爲先帝陵寢則如彼。可勝誅哉。今忠賢已盡竊陛下權。致內廷外朝止知有忠賢。而不知有陛下。尙可一日留左右耶。